

आकाशवाणी

खबरां

1. प्रधानमंत्री नरेंद्र मोदी होरें अज्ज नमीं दिल्ली च 33 ज्हार 500 करोड़ रपे दिएं विकास परियोजनाएं दा उद्घाटन कीता ते केइएं दा नीह पत्थर रक्खेआ।
2. अज्ज अंतरराष्ट्री महिला दिवस ऐ। भारत च बी इस मौके केई कार्यक्रम आयोजित, राष्ट्रपति, उपराष्ट्रपति, प्रधानमंत्री ते केई बड्डे नेताएं इस मौके नारी शक्ति गी नमन कीता।
3. नेपाल च बालेंद्र शाह हुंदी राष्ट्री स्वतंत्र पार्टी दी शानदार जित्त, नमीं सरकार बनाने दी तैयारी।
4. पच्छिम एशिया च जारी संघर्ष दी पछौकडै च कतर च लग्गने आहली आई.सी.सी दी त्रै रोजा बैठक अगडे पाई दित्ती गई ऐ।
5. टी-20 आई.सी.सी विश्व कप दा खताबी मकाबला भारत ते न्यूजीलैंड बश्कार अहमदाबाद च जारी।



PM-Projects

प्रधानमंत्री नरेंद्र मोदी होरें अज्ज नमीं दिल्ली च करीब 33 ज्हार 500 करोड़ रपे दी केई विकास परियोजनाएं च किश दा नीह पत्थर रक्खेआ ते किश दा उद्घाटन कीता। इस मौके अपने संबोधनै च प्रधानमंत्री होरें आखेआ जे राष्ट्री राजधानी च सुविधाएं ते बुनियादी ढांचे गी उप्परोतली निगगर बनाने दे कन्नोकन्नी इंदा विस्तार कीता जा'रदा ऐ। उनें आखेआ कि अज्ज शुरू होई दिएं परियोजनाएं कन्नै बुनियादी ढांचा होर ममजबूत होग। संपर्क राबते च सुधार होग ते आम लोकें दा जीवन सुविधाजनक ते सखल्ला बनोग। मोदी होरें आखेआ कि नमें मेट्रो ब्लॉक कन्नै राजधानी दे लक्खें लोकें गी मता फैयदा पुज्जोग।



Women's Day

अज्ज अंतरराष्ट्रीय महिला दिवस ऐ। इस ब'रे इस ध्याडे दा विशे-सार ऐ- महिलाएं ते बालिकाएं लेई अधिकार, न्याऽ ते कार्रवाई। एह महिला अधिकारें गी मजबूत करने, न्याऽ धोड़ी पुज्ज जकीनी बनाने ते मर्दे ते महिलाएं च बरोबरी च तेजी आहनने दी भावना गी दर्शादा ऐ। इस मौके उप्पर अज्ज देशभरै च केई कार्यक्रमें दा सरिस्ता कीता गेआ। महिला ते बाल विकास मंत्रालय आसेआ नमीं दिल्ली च महिलाएं दी अगुवाई च इक शक्तिवाक दा सरिस्ता कीता गेआ जेह्दे च समाज दे बक्ख-बक्ख वर्गे दे लोकें बधी चढियै हिस्सा लैता।



Prez. Women's Day

राष्ट्रपति द्रौपदी मुर्मु होरें अंतरराष्ट्रीय महिला दिवस पर शुभकामनां दित्तिआं न। उ'नें आखेआ जे महिलां समाज ते राष्ट्र दी नीह न ते शिक्षित, आत्मनिर्भर ते सशक्त महिलां समृद्ध ते प्रगतिशील राष्ट्र दे निर्माण च महत्वपूर्ण जोगदान देई सकदिआं न। राष्ट्रपति होरें आखेआ जे महिलाएं शिक्षा, विज्ञान, खेड्डें, कला ते रक्षा सने केई खेत्तरे च अपनी प्रतिभा ते मेहनत दा परिचय दिता ऐ। उ'नें आखेआ जे अज्ज युवा महिलां नमें भारत दे सुक्खने साकार करा करदिआं न। राष्ट्रपति होरें सबनें नागरिकें गी महिलाएं गी बरोबर दे मौके उपलब्ध करोआने आहले समाज दे निर्माण लेई इकजुट होने दा आह्वान कीता। उपराष्ट्रपति सी.पी राधाकृष्णन, प्रधानमंत्री नरेंद्र मोदी ते होर केई समाजी, सियासी ते धार्मिक संगठनें दे नेताएं बी इस ध्याडे पर सभनें महिलाएं गी ममारकवाद दिंदे होई समाज दे विकास च नारीशक्ति दे योगदान दी सराहना कीती ऐ।



PM-Asmita

प्रधानमंत्री नरेंद्र मोदी होंरें सोशल मीडिया पर युवा मामले ते खेड राज्यमंत्री रक्षा खडसे आसेआ अस्मिता पहल दी कामयाबी पर लिखे दे इक्क लेख गी सांझा कीता ऐ। एह पहल भारती भाशाएं च अकादमिक पढाई सामग्री गी बढावा देने बक्खी इक्क बड्डी गैंऽ ऐ। प्रधानमंत्री नरेंद्र मोदी होंरें अस्मिता गी खेलो इंडिया मिशन दा इक्क हिस्सा दस्सेआ जिसी देश भरै च महिलाएं बश्कार खेडें गी बढावा देने ताई रम्भ कीता गेआ हा। अपने लेख च श्रीमति खडसे नै विस्तार कन्नै दस्सेआ जे किस चाल्ली खेलो इंडिया अस्मिता पहल देस भरै च महिलाएं ते कुडियें ताई खेडें च मौकें दा विस्तार करा'रदी ऐ।

<><><><><><>

Tripura-Asmita

अंतरराष्ट्री महिला दिवस दे मौके पर केंद्री युवा मामलें ते खेड मंत्रालय दी अस्मिता परियोजना तैहत देस भरै च 250 थाहें पर कन्नै-कन्नै खेड प्रतियोगिताएं दा सरिस्ता कीता गेआ। इस कार्जक्रम दा सरिस्ता भारती खेड प्राधिकरण ते माई भारत नै सांझे तौरा पर कीता, जेदा मकसद ग्राएं ते लौहके कस्वे दियें कुडियें गी खेडुं च कैरियर बनाने ताई प्रोत्साहित करना हा। देसा दे होर दुए हिस्सें दे कन्नोकन्नी त्रिपुरा दे ढलाई जिले दे कमलपुर च बी प्रतियोगिताएं दा सरिस्ता कीता गेआ।

<><><><><><>

Ladakh Asmita

लद्दाख च बी अज्ज अंतरराष्ट्री महिला दिवस दे मौके पर माई भारत युवा कारगिल नां आहले इक्क टकोहदे खेड कार्जक्रम दा सरिस्ता कीता गेआ। एह कार्जक्रम भारत सरकार दी अस्मिता पहल तैहत जिला युवा सेवा ते खेड दफ्तर कारगिल दे सहयोग कन्नै आयोजित कीता गेआ। एहदा मकसद खेडुं च महिलाएं दी हिस्सेदारी ते खेडुं च महिलाएं दी हिस्सेदारी ते खेडुं रायं महिला सशक्तिकरण च बढावा देना हा। कार्जक्रम च मुख परौहने दे तौरा पर कारगिल दे अतिरिक्त पुलिस अधीक्षक इशतियाक अहमद काचो मौजूद हे। तोआई, लद्दाख दे कृषि विश्वविद्यालय दे साइंसदान डॉ. सिचेन डोलकर मानजोग परौहने दे तौरा पर मौजूद हियां।

<><><><><><>

Nepal Results

इक रैपर थमां राजनेता बने बालेंद्र शाह हुंदी राश्ट्री स्वतंत्र पार्टी आरएसपी नै नेपाल दे संसदी चुनाएं च शानदार जित्त हासल करियै अगली सरकार बनाने दी तैयारी करी लैती दी ऐ। इस जित्त कन्नै नेपाल दिएं परानी बड्डी-बड्डी पार्टिं गी जबरदस्त झटका लग्गा ऐ। बालेंद्र जेहडे बालेन दे नां कन्नै मती लोकप्रिय न ते आरएसपी दे प्रधानमंत्री दे ओहदे दे मजबूत दावेदार न, नै झापा पंज हल्के च 4 बारी प्रधानमंत्री ते सी.पी.एन-यू.एम.एल दे मेदवार के.पी शर्मा ओली होंरें गी 50 ज्हार कोला मते वोटें कन्नै हराया। बालेन नेपाल दे पैहले मधेसी प्रधानमंत्री होंगन ते कन्नै गै देश दे संसदीय इतिहास च इस सभनें शा बड्हे ओहदे पर बौहने आहले सभनें शा घट्ट उम्मी दे व्यक्ति होंगन। बालेन दी उम्र अजें छडी 35 बरे ऐ।

<><><><><><>

PM-Nepal Congrats

प्रधानमंत्री नरेंद्र मोदी होंरें इक सोशल मीडिया पोस्ट च नेपालवासिं गी उंदे लोकतांत्रिक अधिकारें दा पूरे उत्साह कन्नै इस्तेमाल करने पर खुशी प्रगट कीती। उनें आखेआ कि एह ऐतिहासिक उपलब्धि नेपाल दे लोकतांत्रिक सफर च इक गौरवपूर्ण घडी ऐ। प्रधानमंत्री होंरें आखेआ कि इक मित्तर ते गोआंडी दे रूपै च भारत नेपाल कन्नै मिलियै रमानदारी, तरक्की ते खुशहाली दियां नमियां उंचाइयां छूने लेई बचनबद्द ऐ।

<><><><><><>

PM-Webinar

प्रधानमंत्री नरेंद्र मोदी होर कल संगारें 9 मार्च गी सबका साथ सबका विकास : शिक्षा कौशल ते युनिवर्सिटी टाउनशिप विशे पर इक वेबीनार गी संबोधत करडना सूचना ते प्रसारण मंत्रालय नै दस्सेआ ऐ कि वेबीनार च केंद्री बजट 2026-27 दिएं घोशणाएं पर तफसीली चर्चा होग। इस वेबीनार दा मकसद मुल्लै च शिक्षा, हुनर, एनिमेशन ते विजुअल इफैक्ट्स, गेमिंग ते कॉमिक्स ते क्रिएटर इकोनामी सरबंधी तंत्र गी मजबूत बनाना ऐ।

<><><><><><>

West Asia War

इजराइल नै अज्ज बड्डलै दक्खनी लेबनान पर हमला तेज करी दिता जेह्दे च ईरान दे रिवोल्यूशनरी गार्ड्सकुद्स फोर्स दी लेबनानी शाखा दे कमांडरें गी नशाना बनाया गेआ ऐ। एह्दे शा पैहले इजराइल नै शनिवारें तहरान च इक तेल भंडारपर हमला कीता हा। लेबनान दे सेहत मंत्रालय नै दस्सेआ जे दक्खनी लेबनान च इजराइली ब्लाई हमलें च 8 लोक मारे गे न। मकामी मीडिया नै जानकारी दिती ऐ कि इजराइल दे ड्रोन नै बेरूत दे इक होटल पर हमला कीता जेह्दे च 4 लोक मारे गे न ते 10 कोला मते घायल होई गेदे न। ईरान दे मजूदा राष्ट्रपति मसूद पेजेशिकयन होरें कल गोआंडी मुखें पर हमले लेई माफी मंगी ऐ। इस्सै दरान अमरीका दे राष्ट्रपति डॉनल्ड ट्रम्प होरें ईरान पर जबरदस्त हमला करने दी धमी दिती ऐ ते आखेआ ऐ कि होर बी इलाके नशाने पर होंगन। उनें इस स्तरै पर कुसै बी चाल्ली दे समझौतें दी संभावना नै साफ नां करी दिती ऐ। इस लड़ाई च अजें धोड़ी ईरान च 1 ज्हार 230 लोक लेबनान च 290 कोला मते ते इजराइल च 11 लोक मारे जाई चुके दे न। इस दरान 6 अमरीकी सैनिकें दे बी मारे जाने दी खबर ऐ।

<><><><><><>

India China Partnership

चीन दे बदेश मंत्री वांग ची होरें आखेआ ऐ कि ब्रिक्स सहयोग गी होर मता निगगर बनाने ते ग्लोबल साउथ गी नमी मेद देने लेई चीन ते भारत गी सेही रणनीतिक नजरिया बनाई रखना लोडचदा। उनें आखेआ कि खरे ते दोस्ताना गोआंडी रिश्ते ते मित्रता गी बरकारार रखियै विकास बाद्दे पर ध्यान दिता जाना लोडचदा। पेइचिंग च 14मीं नेशनल पीपल्स कांग्रेस दे चौथे सत्र दरान मीडिया गी संबोधित करदे होई वांग होरें आखेआ कि 2024 च प्रधानमंत्री नरेंद्र मोदी ते राष्ट्रपति शी जिनपिंग हुंदे बश्कार तियान जिन शिखर सम्मेलन दे कारण चीन भारत सरबंधें च होर सुधार आया ऐ। ईरान दे खलाफ अमरीका ते इजराएल दे फौजी अभियान दी निंदेआ करदे होई चीन दे बदेश मंत्री होरें आखेआ जे एहू तनोतनी आहली स्थिति पैदा नेई होनी लोडचदी। उनें आखेआ कि फौजी ताकत दे इस्तेमाल कन्नै इलाके च पैदा संकट आहली स्थिति कदें खत्म नेई होई सकदी। उनें खबरदार करदे होई आखेआ जे ताकत पर निर्भर रौहना, अंतरराष्ट्री बवस्था गी कमजोर करदा ऐ।

<><><><><><>

ICC-Doha Meeting Postponed

पच्छिम एशिया च जारी संघर्ष दे चलदे कतर दे दोहा च 25 कोला 27 मार्च धोड़ी लग्गनी तैह होई दी अंतरराष्ट्री क्रिकेट परिषद आई.सी.सी दी त्रै रोजा बैठक अगड़ी पाई दिती गई ऐ। बैठकै च आईसीसी बोर्ड दे मुख् कार्जकारी अधिकारिण, समिति दे मिम्बरें ते सीनियर नेतृत्व दे शामिल होने दी मेद ही। आईसीसी नै कतर गी इस बैठक लेई इस करियै चुनेआ हा कीजे क्रिकेट कन्नै कतर दा जुडाव उप्परोतली बधदा जा'रदा ऐ।

<><><><><><>

T-20 World Cup

मर्दे दे आई.सी.सी टी-20 विश्व कप दा खताबी मकाबला एल्लै अहमदाबाद दे नरेंद्र मोदी स्टेडियम च मजूदा चैंपियन भारत ते न्यूजीलैंड बश्कार खेडेआ जा करदा ऐ। न्यूजीलैंड नै टॉस जित्ति यै पैहले गेंदबाजी करने दा फैसला लैता ते हुनै कोला किश चिर पैहले भारत नै 4.2 ओवरें च 0 विकटें दे नुकसान पर 57 रन्ज बनाई लैते दे हे। भारत टी-20 विश्व कप दे फाइनल च चौथी बारी पुज्जा ऐ ते अज्ज ओह्दी कोश्ट एहू खताब रिकार्ड त्रीऽ बारी अपने नां करने दी होग। न्यूजीलैंड नै अजे धोड़ी इस प्रतियोगिता दा खताब इक बारी बी हासल नेई कीते दा ऐ, पर उआं ओहू दुई बारी एह्दे खताबी मकाबले च शामिल होने जा करदा ऐ। सूर्य कुमार यादव कप्तानी आहली भारती टीम नै पिछले वीरवार मुम्बई च खेडुे गेदे दुए सेमीफाइनल च इंग्लैंड गी 7 रन कन्नै हराइयै फाइनल च प्रवेश कीता हा जिसलै कि न्यूजीलैंड नै कोलकाता च दक्खन अफ्रीका गी 9 विकटें कन्नै हराया हा।

<><><><><><>

All Eng. Badminton

ऑल इंग्लैंड ओपन बैडमिंटन चैंपियनशिप च भारत दे लक्ष्य सेन मर्दे दे सिंगल्स फाइनल च पुज्जी गे ना। हुन तगर शडा दो भारतीयें एहू चैंपियनशिप जित्ती ऐ। प्रकाश पादुकोण नै 1980 च ते पुलेला गोपीचंद नै 2001 च एहू गौरव हासल कीता हा। लक्ष्य सेन दुई बारी इस प्रतियोगिता दे खताबी मकाबले च पुज्जे हे, जित्थे अज्ज उंदा मकाबला बर्मिंघम च चीनी ताइपे दे लिन-चुन यी कन्नै होआ। 24 बरें दी बरेसू दे सेन नै कल संझा खेडे गेदे इक्क रोमांचक सेमीफाइनल मैच च कनाडा दे विक्टर लाई गी हराइयै फाइनल च अपनी थाह पक्की कीती ही।

<><><><><><>

America Arrest

अमरीका दे न्यूयार्क च इक बरोध प्रदर्शन दरान शैहर दे मेयर जोहरान ममदानी हुंदे घरै दे बाहर धुआं छोडने आहले गोले सुटने दे आरोप च 6 लोकें गी हिरासतै च लैता गेआ ऐ। अधिकारिणं दस्सेआ ऐ जे कल दक्खनपंथी कार्जकर्ता जेकलैंग आसेआ आयोजित प्रदर्शन दरान तनोतनी बधी गई ही ते हालात काबू शा बाहर होई गे हे।

<><><><><><>

Weather

मौसम विभाग नै जम्मू-कश्मीर ते उत्तराखंड च 13 मार्च तगर छिटपुट बरखा बरने दी पेशगोई कीती ऐ। मैहकमे नै अंदाजा लाया ऐ जे समुंद्री कंडे आहले आंध्र प्रदेश, केरल ते माहे च शमानी बिजली पेई सकदी ऐ। अगले त्रै, चार दिनें च उप हिमालयी पच्छिम बंगाल ते सिक्किम च बी इस्सै चाल्ली दे हालात रौहने दी मेद ऐ। अज्ज हिमाचल प्रदेश ते विदर्भ च लू चलने दी बी पेशगोई कीती गेदी ऐ।

<><><><><><>